



Broj:01-02-5178/23-6
Ilidža, 04.10.2023.godine

Na osnovu člana 13. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine, broj 49/06, 51/09) i člana 28. Statuta Općine Ilidža ("Službene novine Kantona Sarajevo", broj 33/10- Prečišćeni tekst i 18/16) Općinsko vijeće Ilidža na 23. redovnoj sjednici održanoj dana 04.10.2023. godine, donijelo je :

PRAVILNIK O STIPENDIRANJU UČENIKA I STUDENATA OPĆINE ILIDŽA

DIO I – OSNOVNE ODREDBE

Član 1. (Predmet Pravilnika)

- (1) Ovim pravilnikom utvrđuju se osnove, kriteriji i način stipendiranja redovnih učenika javnih ustanova srednjih škola i redovnih studenata javnih visokoškolskih ustanova članica Univerziteta u Sarajevu, redovnih studenata javnih visokoškolskih ustanova koji ne postoje na Univerzitetu Sarajevo a nalaze se na području Bosne i Hercegovine, kao i redovnih učenika privatnih srednjih škola i redovnih studenata privatnih visokoškolskih ustanova na području Kantona Sarajevo koji su na osnovu ostvarenih rezultata u znanju stekli pravo na stipendiranje školarine u iznosu od 100%, (u daljem tekstu: učenici i studenti).

Član 2. (Učenici i studenti kojima se dodjeljuju stipendije)

- (1) Stipendije po ovom Pravilniku dodjeljuju se sljedećim učenicima i studentima:
- a) koji su ostvarili odličan uspjeh u prethodnoj školskoj/akademskoj godini
 - b) koji su ostvarili uspjeh u prethodnoj školskoj/akademskoj godini a imaju određeni iznos prihoda po članu zajedničkog domaćinstva.

DIO II - USLOVI ZA DODJELU STIPENDIJE

Član 3. (Opći uslovi)

- (1) Prijavu za dodjelu stipendije mogu podnijeti učenici i studenti koji ispunjavaju sljedeće opće uslove:
- a) da su državljani Bosne i Hercegovine;
 - b) da imaju prebivalište na području općine Ilidža;
 - c) da su redovni učenici javnih ustanova srednjih škola i redovni studenti fakulteta/akademija (javne visokoškolske ustanove) članica Univerziteta u Sarajevu, redovni studenti javnih visokoškolskih ustanova koji ne postoje na Univerzitetu Sarajevo a nalaze se na području Bosne i Hercegovine ili redovni učenici privatnih srednjih škola i redovni studenti privatnih visokoškolskih ustanova na području Kantona Sarajevo koji su na osnovu ostvarenih rezultata u znanju stekli pravo na stipendiranje školarine u iznosu od 100%, a koji su prvi put upisani na godinu studija za koju konkurišu za stipendiju;
 - d) da nisu obnovili prethodnu godinu studija;
 - e) da po istom osnovu nisu ostvarili stipendiju od nekog drugog organa, institucije, javnog preduzeća ili fondacije.

Član 4.

(Posebni uslovi za učenike i studente koji su ostvarili odličan uspjeh)

- (1) Posebni uslovi za učenike i studente koji su ostvarili odličan uspjeh u prethodnoj školskoj /akademskoj godini su:
 - a) učenici prvog razreda srednjih škola koji su od šestog do devetog razreda osnovne škole imali najmanju prosječnu ocjenu 4,90 i primjerno vladanje kao i učenici drugog, trećeg i četvrtog razreda sa najmanjom prosječnom ocjenom 4,90 i primjerenim vladanjem;
 - b) redovni studenti prve godine fakulteta/akademija sa najmanjom prosječnom ocjenom 4,90 i primjerenim vladanjem u završnom razredu srednje škole;
 - c) redovni studenti (I i II ciklus studija) fakulteta grupacije tehničkih i medicinskih nauka sa prosječnom ocjenom najmanje 7,50 i ostalih fakulteta/akademija, sa prosječnom ocjenom najmanje 8,50.

Član 5.

(Posebni uslovi za učenike i studente koji su ostvarili uspjeh a imaju određeni prihod po članu domaćinstva)

- (1) Posebni uslovi za učenike i studente koji su ostvarili uspjeh u prethodnoj školskoj/akademskoj godini a imaju određeni prihod po članu domaćinstva su :
 - a) učenici prvog razreda srednjih škola koji su u devetom razredu osnovne škole imali najmanju prosječnu ocjenu 3,50 i primjerno vladanje, kao i učenici drugog, trećeg i četvrtog razreda sa najmanjom prosječnom ocjenom 3,50 i primjernim vladanjem;
 - b) redovni studenti prve godine fakulteta/akademija sa najmanjom prosječnom ocjenom 3,50 i primjernim vladanjem u završnom razredu srednje škole;
 - c) redovni studenti (I i II ciklus studija) fakulteta grupacije tehničkih i medicinskih nauka sa prosječnom ocjenom najmanje 7,00 i ostalih fakulteta/akademija, sa prosječnom ocjenom najmanje 7,50.
- (2) Učenici i studenti koji ispunjavaju posebne uslove iz stava (1) ovog člana moraju imati prihod po članu zajedničkog domaćinstva do 350,00KM.

DIO III- KOEFICIJENTI, OSNOVICA I VISINA STIPENDIJE

Član 6.

(Koeficijent i visina stipendije za učenike i studente koji su ostvarili odličan uspjeh)

- (1) Koeficijent za utvrđivanje iznosa stipendije za učenike i studente koji su ostvarili odličan uspjeh se određuje na osnovu rezultata koje je kandidat postigao u školskoj/akademskoj godini za koju se dodjeljuje stipendija kako slijedi:

Redni broj	Uspjeh		Koeficijent i visina
1.	Učenik srednje škole	najmanje 4,90	1,3 - 143,00 KM
2.	Student prve godine fakuteta/akademije	najmanje 4,90	1,5 - 165,00 KM
3.	Student grupacija medicinskih i tehničkih nauka sa prosječnom ocjenom	7,50 - 8,49	1,7 - 187,00 KM
4.	Student sa prosječnom ocjenom	8,50 - 8,99	1,8 - 198,00 KM
5.	Student sa prosječnom ocjenom	9,00 - 9,49	1,9 - 209,00 KM
6.	Student sa prosječnom ocjenom	9,50 - 10,00	2,0 - 220,00 KM



**Član 7.
(Visina osnovice)**

- (1) Visina osnovice za utvrđivanje iznosa stipendije za učenike i studente koji su ostvarili odličan uspjeh je 110,00 KM.

**Član 8.
(Visina stipendije)**

- (1) Visina mjesečne stipendije za učenike i studente koji su ostvarili odličan uspjeh se dobije množenjem osnovice iz člana 7. i pripadajućeg koeficijenta iz člana 6. ovog Pravilnika.
- (2) Visina mjesečne stipendije za učenike i studente koji su ispunili uslove iz člana 5. iznosi za učenike 143,00 KM, a za studente 192,00 KM.

DIO IV– NAČIN I POSTUPAK DODJELE STIPENDIJE

**Član 9.
(Konkurs)**

(1) Konkurs za dodjelu stipendija učenicima i studentima raspisuje općinski načelnik na prijedlog Službe za obrazovanje, kulturu, sport i mlade za stipendije iz člana 2. stav (1) tačka a) i Službe za socijalna pitanja, zdravstvo, izbjeglice i raseljena lica za stipendije iz člana 2. stav (1) tačka b).

(2) Konkurs sadrži:

- a) kriterije iz člana 3., 4., i 5. ovog Pravilnika
- b) rok za podnošenje prijave na konkurs i potrebnu dokumentaciju;
- c) obrasce za prijavu po ovom Pravilniku.

(3) Konkurs se objavljuje u formi obavještenja, u dnevnom listu koji izlazi na području Kantona Sarajevo, a kompletan tekst na zvaničnoj web stranici Općine Ilidža.

**Član 10.
(Odluka o stipendiranju)**

- (1) Odluku o stipendiranju učenika i studenata donosi općinsko vijeće na prijedlog općinskog načelnika.
- (2) Odluka o stipendiranju učenika i studenata će biti objavljena na zvaničnoj web stranici Općine Ilidža.
- (3) Prijavljeni kandidati o rezultatima izbora će biti obavješteni putem zvanične web stranice Općine Ilidža.

**Član 11.
(Upravni spor)**

Odluka Općinskog vijeća Ilidža iz člana 10. ovog Pravilnika je konačna i kandidat nema pravo prigovora, ali može pokrenuti upravni spor.

DIO V – STIPENDIRANJE

**Član 12.
(Isplata stipendije)**

- (1) Stipendija se dodjeljuje za jednu školsku/akademsku godinu i isplaćivat će se 10 mjeseci.
- (2) Sredstva dodijeljena stipendijom se ne vraćaju.



Član 13.
(Ugovor o stipendiranju)

(1) Ugovor o stipendiranju učenika/studenta sadrži: ime i prezime učenika/studenta, ime i prezime roditelja/staratelja i njegovu tačnu adresu, naziv škole/visokoškolske ustanove, način isplate.

(2) Ugovor potpisuje roditelj/staratelj učenika, učenik ili student i općinski načelnik u ime Općine Ilidža.

Član 14.
(Sredstva za stipendiranje)

Budžetom Općine Ilidža planiraju se budžetska sredstva potrebna za stipendiranje učenika i studenata.

DIO VI – PRELAZNE I ZAVRŠNE ODREDBE

Član 15.
(Gramatička terminologija)

Gramatička terminologija korištenja muškog roda u ovom Pravilniku podrazumijeva uključivanje oba roda.

Član 16.
(Prestanak važenja ranijeg propisa)

Stupanjem na snagu ovog Pravilnika stavlja se van snage Pravilnik o stipendiranju talentovanih učenika i studenata („Službene novine Kantona Sarajevo”, broj 39/13 i 20/23) i Pravilnik o stipendiranju učenika i studenata slabijeg imovnog stanja („Službene novine Kantona Sarajevo” broj 1/13, 27/13 i 44/22).

Član 17.
(Stupanje na snagu)

Ovaj Pravilnik stupa na snagu osmog dana od dana objavljivanja u „Službenim novinama Kantona Sarajevo”.

PREDSJEDAVAJUĆI

Tarik Stambolić, magistar poslovnog prava

DOSTAVLJENO:

1. Općinski načelnik
2. Služba za obrazovanje, kulturu, sport i mlade
3. Služba za socijalna pitanja, zdravstvo, izbjeglice i raseljena lica
4. Služba za finansije
5. Služba za usklađenost, integritet i kontrolu kvaliteta
6. Kabinet općinskog načelnika- za objavu na WEB stranicu
7. Za objavu „SNKS“
8. Evidencija
9. a/a

